



## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

---

### ასისფორი

ასისფორი, მხარე ისტორიულ სამხრ. საქართველოში. ტაოში (ახლანდ. თურქ. ტერიტ.). ა. [ასის ხევი // არსის ხევი, იგივე „სომხური გეოგრაფიის“ (VII ს.) „არსიაცფორია“] მდებარეობს მდ. ჭოროხის შუაწელზე, კლარჯეთსა და სპერს შორის, ჭოროხის ხეობის იმ ნაწილში, რ-იც პარხლისწყლისა (პარხალისუ) და თორთომისწყლის (თორთუმჩაი) ხეობებს შუაა მოქცეული. სახელი ეწოდება სოფელ არსისისგან, რ-იც მდებარეობს მდ. ჭოროხის მარჯვ. მხარეს. ა. ქართ. წყაროებში პირველად „მატიანე ქართლისაში“ (XI ს.) იხსენიება VIII ს. ამბებთან დაკავშირებით, ამ დროს ის ადარნასე ბაგრატიონის სამფლობელოში შედიოდა. 1080 ა. თურქ-სელჩუკებმა ააოხრეს. XIII ს. 70-იანი წლებიდან ეს მხარე სამცხის სამთავროს (სამცხე-საათაბაგო) ეკუთვნოდა. XI-XVI სს-ში ა-ის დიდი ნაწილი კავკასიისძეთა ფოთდ. საგვარეულოს ხელში იყო, ამიტომ XIV-XVI სს. წყაროებში ის „საკავკასიძეოს“ სახელითაც იხსენიება. უკანასკნელად ა. XV-XVI სს-ით დათარიღებულ წერილში გვხვდება. 1549-50 ა. მთელ ტაოსთან ერთად ოსმალებმა დაიპყრეს და მის ტერიტორიაზე ფერთექრეჯის (შემდეგ კისკიმის) ლიჯა შექმნეს, რ-იც მოგვიანებით ახალციხის საფაშოს (ჩილდირის ვილაიეთი) შემადგენლობაში შევიდა. ა-ის მხარეში შემავალი ისტ. პუნქტებია: ოთხთა ეკლესია, შე, არსისი, ნეჯახი, ფერთექრეჯი, კისკიმი.

წყარო: ქართლის ცხოვრება, ს. ყაუხჩიშვილის გამოც., ტ. 1, თბ., 1955.

ლიტ.: თ ა ყ ა ი შ ვ ი ლ ი ე., 1917 წლის არქეოლოგიური ექსპედიცია სამხრეთ საქართველოში, თბ., 1960; მ უ ს ხ ე ლ ი შ ვ ი ლ ი დ., საქართველოს ისტორიული გეოგრაფიის ძირითადი საკითხები, ნაწ. 2, თბ., 1980.

**ა. თორდია**

---